




KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 3, No. 1

website: www.geocities.com/navalbec

Agosto 2006



Most Rev. Filomeno G. Bactol, D.D.

Mensaje

Wala lang nato mamatikdi apan gisaulog nato karong bulan sa Agosto ang ikatulo ka tuig nga pagkahimugso sa atong BEC newsletter nga KATILINGBAN. Kini nga mantalaan nahimugso aron madugtong ang tanan natong mga kasinatian diha sa BEC ug mamahimong inspirasyon sa tanan. Gihimo usab kini aron mamantala ang atong mga pamalandong sa sinemana nga selda prayer sessions.

Hinaut pa unta nga nakab-ot nato kini nga mga panuyo sulod sa tulo ka tuig. Ug hinaut pa unta nga matubag pa nato ang uban pa nga mga panginahanglan sa BEC pinaagi niining ubos nga mantalaan. Mahimo unta kini nga instrumento aron ang mga seldas nato padayon diha sa sinemana nga pag-ampo ug sa pagpaambit.

Usa ka pahinumdom: ayaw ninyo ilabog ang inyong kopya sa KATILINGBAN human sa paggamit niini. Hipusa kini. Maayo nga isulod kini ug usa ka folder aron adunay file ang matag selda. Maanindot nga mahipus kini aron puede pa nga magamit sa umaabot nga mga adlaw.

Daghang salamat sa inyong kanunay nga pag-amping sa inyong KATILINGBAN. Sa inyong paggamit niini, ang tibuok katilingban sa atong parokya nakadawat ug kalauman sa padayon nga pagtubo ug paglambo sa atong mga BECs diha sa mga seldas o *small caring groups*.

Ang Ginoo magapanalangin kaninyo kanunay!

Bishop FILOMENO G. BACTOL, D.D.
ug mga Kaparian sa Naval



PAMALANDONG SA EBANGHELYO

Agosto 6, 2006: Mahimayaong Pagka-Usab sa Panagway sa Ginoo
Basahon : Dn. 7:9-14 / 2Pt. 1:16-19 / Mk. 9: 2-10

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Ang pulong Transfiguracion kon ang Mahimayaong Pagkausab sa Panagway sa Ginoo nagpahayag sa dagway sa mga tawo nga nakaila kon unsa ang pag-antus ug sila misanag sa kahayag nga nagagikan sa ilang kinahiladman. Atong mapananglitan dinhi si Helen Keller, siya nga buta sukad pa sa iyang pagkabata apan nakakita sa kahayag diha sa iyang kangitngit ug mipadayag niini ngadto sa uban. O di ba hinoon, si Arsobispo Oscar Romero nga nakakitag usa ka panan-awon sa kahimayaan ni Cristo ug kini naglig-on kaniya bisan pa hangtod sa iyang kamatayon.

Ang Mahimayaong Pagkausab sa Panagway sa Ginoo dili lang kay sa usa ka pasiplat sa diosnong himaya, ni pasiuna alang sa katapusang pag-anhi ni Hesus. Kini usab nagpadayag sa paglaum diin kitang tanan gitawag. Ni San Ireneo pa, "ang kahimayaan sa Dios mao ang katawhan nga nagkinabuhing hingpit."

Ang dangatan sa matag Kristohanon nahamutang diay taliwala sa duruha ka bukid: gikan sa bukid sa Kalbaryo, ang bukid sa kasakitan, ngadto sa bukid Tabor, ang bukid sa kahimayaan. Ug ang dagway sa buhing Dios makit-an diha sa mga nawong nila nga namati sa pulong ni Cristo ug nabag-o ug nausab pinaagi niini.

Pamalandongi kini:

Kining maong kasaulogan maghatag kanimog dakong paglaum sa imo unyang pagadangan: ang imong kahimayaan. Apan namati ka ba sa pulong ni Cristo ug mitugot nga mausab ug mabag-o pinaagi niining maong pulong?

Agosto 13, 2006: Ika-19 nga Domingo "Sulod Sa Tuig"
Basahon : 1Kgs. 19:4-8 / Eph. 4:30-5:2 / Jn. 6: 41-51

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Sa pag-ingon ni Hesus, "Ako mao ang pan nga gikan sa langit," naukay dayon ang dakong pundok sa katawhan. Daghan kanila nagbagulbol.

Wala magkasinabtanay si Hesus ug ang mga namati kaniya. Sa wala pa niya ipaila ang iyang kaugalingon nga pan sa kinabuhi, si Hesus miambit na sa pan nga kanunay nilang gikaon. Gani nakig-uban siya kanila sa ilang pagpangaon sulod sa dugayng panahon.

Human niadtong mga tuiga, ang katawhan nakaila kaniya nga usa ka tawo nga nakig-ambit kanila sa ilang pagpangaon. Pulong pa nila, "Dili ba si Hesus man kini, ang anak ni Jose? Nganong miangkong man siya nga nanaog siya gikan sa langit?" Ang ilang pagsalikway kaniya nagasukad sa ilang pagtan-aw kaniya sa iyang pagpakig-uban kanila sa ilang pagpangaon. Wala nila makit-i nga sa iyang pagpakig-uban og pangaon kanila siya mipaambit usab sa iyang kaugalingong kinabuhi diha sa pan. Sulti pa niya, 'ang pan nga akong ihatag kaninyo

mao ang akong unod aron mabuhi ang kalibutan." Si Hesus lamang mao ang naghatag sa pan.

Angay natong hinumdoman kanunay nga ang Dios mao gayod ang unang mipaambit sa iyang kinabuhi ngari kanato.

Pamalandongi kini:

Matag saulog nato sa Santos nga Eyukaristiya, gisubli paghatag ni Hesus ang iyang kaugalingon ngari kanato. Sa imong pagkalawat kaniya, unsa may imong tubag sa iyang walay puas nga pagtanyag sa iyang kaugalingon nganha kanimo? Makasulti ka ba sa tumang makamtinud-anon nga nahimo kang mas Kristohanon?

Agosto 20, 2006: Ika-20 nga Domingo "Sulod sa Tuig"
Basahon: Prv. 9:1-6 / Eph. 5:15-20/ Jn. 6:51-58

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Ang ebanghelyo niini karong Domingoha mao ang panapos sa diskurso mahitungod sa Pan sa Kinabuhi.

Walay pulos kon sulayan nato pagbulag ang unsay gustong isulti ni Hesus gikan sa unsay nasabtan sa magsusulat niining ebanghelyoha. Kining maong diskurso nagasukad sa pagpamalandong sa Simbahan sa iyang pagsinati kang Hesus diha sa iyang pulong ug diha sa Santos nga Eyukaristiya. Siya mao ang buhing pan nga gikan sa langit ug nagpabiling ingon niana alang kanato. Gihatag ni Hesus ang iyang unod ug dugo aron mabuhi ang kalibutan.



KATILINGBAN
Mag-aapil nga mensahe sa Dios: Ewanghelyo, Komunikasyon, ug Paggana sa Mundo

TEAM MINISTRY

Team Moderator: Bishop Filomeno G. Bactol, D.D.

Team Members:

- Fr. Marvyn A. Maceda
- Fr. Florencio Gerones
- Fr. Kenneth Hendricks
- Fr. Cornelio AMante, Jr.

Newsletter Moderator:

Fr. Marvyn A. Maceda

Encoder:

Vinna Sabroso

Computer Specialist

Oscar O. Borrinaga

Business Managers:

- Rizalito V. Curso
- Conchita Calvez

PARISH FORMATION TEAM

- | | |
|------------------|--------------------|
| Eudoxia Canonoy | Reymund Icaín |
| Linda Roldan | Jonnell Quilaneta |
| Necitas Casado | Alfredo Olaer |
| Catalina Machete | Alfredo Paghubasan |
| Sonia Pitao | Danny Jayubo |
| Josephine Romero | Gualberto Tonelete |
| | Ramises Bongabong |
| | Jorge Manco |
| | Buddy Castro |

Ang panapos niining maong diskurso nahadugtong gayod sa mga pagsaysay mahitungod sa Katapusang Panihapon. Si Hesus mismo misulti nga diha sa iyang pag-antos ihalad niya ang iyang kaugalingon isip makaon ug mainom. Ang pagkalawat kaniya nagkahulugan diay og pagpakigsuod kaniya sa bag-o ug hingpit nga paagi. Sila nga mokalawat mahalakip ngadto sa kinabuhi ni Hesus, Sa ingon sila usab gidapit sa walay sukod nga pagtahan sa ilang mga kinabuhi.

Pamalandongi kini:

Karon nga imo nang nasabtan ang kamahingdunon sa Santos nga Eyukaristiya alang sa imong kinabuhi, andam ka ba motahan – sa walay sukod – sa imong kinabuhi alang sa uban ingon nga walay sukod mitahan si Hesus sa iyang kinabuhi alang kanimo?

Agosto 27, 2006: Ika-21 nga “Domingo Sulod sa Tuig”
Basahon: Jos. 24:1-18/ Eph. 5:21-32/ Jn. 6:60-69

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Human midiskurso si Hesus mahitungod sa Pan sa Kinabuhi, naukay ang pagtuo sa mga namati kaniya. Lakip na niini ang pipila sa iyang mga tinun-an. Gani mihunong sila pagkuyogkuyog kaniya.

Wala gayod moluwat si Hesus sa gikinahanglan alang sa pagtuo. Hinoon iyang gipunting ngadto sa iyang tinun-an ang kawalay pulos sa pagsulay sa tawhanong kusog ug gahom.

“Kamo ba usab mobiya kanako?” Kining pangutanaha masuknaong motukmod kanato sa paghimog baruganan. Asa man kita? Mouban ba kita sa mga walay pagtuo o di ba hinoon mokuyog kita sa Napulog-duha. Sa ngalan sa napulog-usa si Pedro mitubag, “Ginoo, asa man kami paingon? Anaa kanimo ang mga pulong sa kinabuhing dayon.”

Dili gayod nato mahimong limotlimotan ang atong gipangako sa Dios. Ang sumusunod ni Cristo kinahanglang mosalig lamang kaniya.

Sa atong pagpanlimbasog isip magtutuo, kitang mga Kristyanos mag-antos gayod. Aduna man gayod kalahian ang pagtuo nga atong gihuptan ug ang paagi sa atong paghubad sa maong pagtuo diha sa atong adlaw-adlaw nga pagkinabuhi. Apan ang atong kahuyang sa pagtuo maoy atong mga agulo. Agig pagmatuod niini iya kitang gigasahan, diha sa Santos nga Eyukaristiya, sa mismong kinabuhi sa iyang Anak.

Pamalandongi kini:

Kon ikaw pay gipangutana ni Hesus, “Ikaw ba usab mobiya kanako?” Unsa may imong tubag? Mohimo ka ba usab ug imong baruganan?

Kon magmahuyang na ang imong pagtuo, unsa may imong buhaton?

BEC Balita

Seminar sa mga Parish Secretaries

Gipasiugdahan sa Office of the Chancery sa Dioses sa Naval ang *Basic Orientation Seminar on Parish Office Apostolate* niadtong June 30-July 2, 2006 sa Marvin’s Place, Atipolo. Gitambungan ang maong seminar sa 28 ka mga parish office secretaries ug Chancery personnel alang sa dugang pang kahibalo sa mga gimbuhaton sa parish office sa konteksto sa pagpangalagad sa Simbahan ug sa BECs.

Ang mga mitambong mao kining mosunod:

Almeria: Liza Sabornido; **Biliran:** Ma. Luisa Entrolizo; **Cabucgayan:** Mecil Amistoso; **Caibiran:** Carla Mocerro; **Calubian:** Annabelle Sevillano; **Consuegra:** Heidi Singcol; **Culaba:** Cynthia Cabunos, Joe Baculanta; **Kawayan:** Ines Asodisen, Edgar Benaldo; **Leyte:** Arsenia Amante; **Lucsoon:** Liza Serdoncillo; **Maripipi:** John Kim Gaviola; **Naval:** Rita Quijano, Josephine Romero, Angelyn Bactol; **San Isidro:** Zenaida Peloca, Francisco Salarda, Jr.; **Tabango:** Ma. Flora Mativo; **Talustusan:** Joy Malabo, Alma Decinilla; **Tucdao:** Lydia Convenido, Elvie Cabintoy; **Villalon:** Lelia Batuto.

Chancery Staff/Facilitators: Mennen Gaviola, Sr. Ma. Annabella Escartin (DST), Rev. Fidel Dandan, Rev. Fr. Benjamin Pantas (JCD), Rev. Fr. Marvyn Maceda

Ang Chancery Office nagpasalamat sa mosunod nga mga BECs nga naghatag ug hinabang–pinansyal alang sa kalampanan sa maong kalihukan: Naval, Atipolo, Agpangi, ug Catmon.

BEC Graduation sa Tagumpay (Sto. Nino) ug Ilaya (Cabungaan)

Nagmalampuson ang gihimo nga BEC Basic Orientation Seminar nga gipasiugdahan sa mga PFTs didto sa Sitio Tagumpay, Brgy. Sto. Niño niadtong Hunyo 19–25, 2006. Upat ka selda ang naumol didto nga naglangkob ug 22 ka mga pamilya. Ang napili nga mga selda alagad mao sila si: Sis. Lorna Cajipe, Sis. Lolita Suliva, Sis. Wilfreda Marcellones, ug Brod Rodrigo Arsulan. Gihimo ang graduation ceremonies niadtong Hunyo 24 sa alas 6:00 PM didto sa Kapilya sa Brgy. Sto. Niño. Gipanguluhan ni Fr. Bebot Gerones ang santos nga misa ug ang seremonyas sa graduation.

Malipayon usab nga gitapos sa Sitio Ilaya, Brgy Cabungaan ang ilang BEC Basic Orientation Seminar niadtong July 9, 2006, 6:00 PM human sa halos usa ka semana nga seminar sa mga PFTs. Singkuenta (50) ka mga pamilya ang mitapos sa maong seminar, 32 ka pamilya gikan sa Villa Caneja ug 18 ka pamilya gikan sa Ilaya. Duha ka selda ang naumol didto sa Ilaya; ang mga selda alagad nga napili mao sila si Sis. Leonisa Pica ug Sis. Elena Dacara. Gipanguluhan ni Fr. Marvyn Maceda ang santos nga misa ug graduation ceremonies.

Re-orientation ug BEC seminar sa San Roque, Larrazabal

Sa hingyap nga mapalig-on pa ang katilingban sa BEC Sitio San Roque sa Brgy. Larrazabal, gipasiugdahan sa mga PFTs ang usa ka re-orientation seminar niadtong July 13, 2006 gikan sa alas 7:00 PM hangtud 10:00 PM didto sa ilang sitio chapel. Usa sa resulta sa maong seminar mao ang hangyo sa kadaghanan nga maghimo pa ug BEC Orientation Seminar kay daghan pa ang interesado nga mga pamilya nga moapil sa kalihukan sa Simbahan sa pagbag-o pinaagi sa BEC.

Ang BEC Orientation Seminar gisugdan niadtong July 16, 2006. Natapos kini niadtong July 24, 2006 pinaagi sa usa ka misa ug graduation ceremonies nga gipanguluhan ni Fr. Dyon Amante, Jr. Trentay uno (31) ka pamilya ang mitapos sa maong orientation.

BEC Seminar sa Dapdap, Agpangi

Gihimo ang usa ka BEC Seminar didto sa Brgy. Agpangi Chapel niadtong July 26-30, 2006 nga gitambungan ug 22 ka mga pamilya sa Sitio Dapdap ug 4 ka pamilya sa Brgy. Agpangi. Gihimo ang graduation niadtong July 31, 2006, Lunes, pinaagi sa usa ka misa nga gipanguluhan ni Fr. Marvyn Maceda sa alas 6:00 PM. Ang napili nga mga selda alagad sa Sitio Dapdap mao sila si Brod Eugenio Sangcap ug Brod Elie Madrona. Congratulations!

Ordinasyon pagka Diakono

Malipayon ang tibuok katilingban sa Diosesis sa Naval sa pagdawat sa Ordinasyon sa Pagka Diakono ni Rev. Fidel Dandan niadtong July 4, 2006 sa alas 2:00 PM didto sa Katedral sa Inahan sa Santos nga Rosaryo, Naval, Biliran. Ang nag-orden kaniya mao ang halangdong Obispo sa Naval, Most Rev. Filomeno G. Bactol, D.D. nga gikonsebrahan usab sa mga kaparian sa diosesis.

Si Rev. Fidel Dandan, 45 anyos, taga Leyte, Leyte, usa ka accountant ug dugay nga nagtrabaho didto sa Bahrain sa wala pa siya mosulod sa seminaryo. Gitapos niya ang iyang theology didto sa UST-Central Seminary niadtong tuig 2005.

Sa karon si Rev. Dandan anaa mag-alagad sa atong parokya dinhi sa Naval. Congratulations Reverend Fidel Dandan!

BEC ACTIVITIES

Agosto 2006

CLUSTER FELLOWSHIP

August 5, 2006 (1st Saturday)
BEC Ilaya & Brgy. Smo. Rosario
Venue: Cathedral Church
Time: 7:30 P.M. – 10:00 P.M..

PAROCHIAL FELLOWSHIP

August 19, 2006 (3rd Saturday)
Venue: Libtong Gamay Chapel
Time: 7:30 am – 3:00 pm.

August 20, 2006 (3rd Sunday)
Venue: Brgy. Smo. Rosario Chapel
Time: 7:30 am. – 3:00 pm.

BEC ANNIVERSARY

BEC Sitio Rosales,
Haguichikan
August 3, 2006

BEC Sitio Puro Bliss
August 16, 2006

BEC Brgy. Agpangi
(Our Lady of Immaculate)
August 12, 2006

BEC Sitio San Roque,
Larrazabal
August 27, 2006

LJC Rice Mill
Sitio Lupa, Calumpang
& **Groceries**
Ground Floor, Naval Mall

Owned & Managed by:

RAMISES "Bong" BONGABONG